

Pansa, Caspar

De Vita Et Morte Nobilissimi, Amplissimi Prudentissimique Viri, Domini
Jacobi Pömeri, Senatoris Reipub. Norimbergensis praestantissimi, ac
illustris Academiae Altorphinae Scholarchae laudatissimi, qui die
Decembris 2. anno 1607. in patria placide decessit, Oratio

Norimberga 1608

Res/4 Biogr. 278,20

urn:nbn:de:bvb:12-bsb10887752-4

VD17 39:143666C

* Res. 4*
*
* Biogr. *
*
* 278 *
*
* 20 *

4 Bopr. 278,20

DE
VITA ET MORTE
NOBILISSIMI,
AMPLISSIMI PRU-
DENTISSIMIQUE VI-
RI, DOMINI IACOBI PÖMERI,
SENATORIS REIPUB. NORIMBERGEN-

sis præstantissimi, ac illustris Academiae Altorphinae

SCHOLARCHÆ laudatissimi, qui die De-
cembris 2. anno 1607. in patria
placidè decessit,

O R A T I O:

*Gratitudinis ergò conscripta & habita publicè
die Februarii 2. Altorphii,*

à

Cassaro Pansa, Philosophiæ ac SS. LL. studioso.

Addita sunt etiam carmina in ejusdem obitum.

Psalm: 112.

Nominis in nullos justi obliviscitur annos,
Æternum credens vivit in orbe Deo.

N O R I B E R G Æ,

Et Typographéo Pauli Kaufmanni.

CLD ID CVIII.

Biogr.

278

-20-



*Nobilissimi generis, optimæ indolis ac summæ spei
laude præstantissimis adolescentibus:*

VVolffgango Iacobo Poemero, discipulo
amantissimo,

Alberto Poemero: fratribus germanis, super-
stitibus defuncti Poemeri filiis:

hanc de vita Patris commemorationem

offert ac dedicat

*Casparus Pansa Henne-
bergicus, Francus.*

RECTOR ACADE-
MIÆ ALTORPHINÆ, ER-
NESTVS SONERVS, MEDICINÆ

DOCTOR, omnibus Academicis

S. P.



*U*m piū atq; officiosū semper fu-
it habitum, eorū, qui de nobis pri-
vatim benè meriti sunt, etiam post
mortem gratam conservare memo-
riam; tum vel in primis laudabile, imò necessari-
um est iudicatum, quorum præclara non in pri-
vatos tantum, verū in Remp. etiā extant merita,
ut istorum, quando in vivis esse desierint, apud nos
tamen officiosa recordatione perpetuò reviviscere,
ac nunquam intermoritura esse beneficia decla-
remus. Ut enim nihil est, quod magis liberalita-
tis fontes occludat, quàm ingratitude accipienti-
um: ita vicissim eosdem nihil magis aperire atq;
prolicere potest, quàm iusta benefactorum nostro-
rum prædicatio, & crebra commemoratio benefi-
ciorum cum studio præstandi se dignos. Quando
ergò sub finem anni superioris præceps & inopina-
tus casus nobilissimum, amplissimum & pru-
dentissimum virum, dominum I A C O B U M

POEMERUM, Senatorem Reip. Noribergensis
& Scholarum dignissimum, nobis abstulit, im-
medicabili vulnere patriæ & hujus Academiae,
quæ inter cæteros Patronos & Mæcenates am-
plissimos ac nunquam satis laudatos (quos divi-
na Clementia diu nobis conservet incolumes) de
hoc Scholarum mirificè sibi gratulabatur, eoque ex-
ultabat unicè, ac sibi videbatur felix: idcirco qui-
dam studiosus, officii & acceptorum beneficiorum
memor, cras horâ 1 x. oratione funebri parenta-
les faciet exequias. Ad hanc audiendam, illustrem
& generosum dominum Baronem, reverendos,
clarissimos & doctissimos d d. Professores ac Præ-
ceptores, nobilissimos & ornatissimos dominos stu-
diosos, ut dictâ horâ in Collegio confluere velint,
amanter invitamus & rogamus: idque in ho-
norem defuncti meritissimi, familiæq; supersti-
tis solatium. Dabimus verò & nos operam, ut
hujus humanitatis & benevolentiae vestrae me-
mores esse intelligatis. B.V. P.P. Altorphii, die
purificationis Mariæ, ANNO reparate salu-
tis c l o l o c v i i i.

ORA-



SINGULARI cum attentione si considera-
 mus rerum universitatem, inveniemus, no-
 bilissimi, amplissimi viri, Scholarcha, Se-
 natores laudatissimæ Reip. Norimbergensis
 præstantissimi, hospites gratissimi, magnifi-
 ce domine Rector, illustris ac generose domine Baro, re-
 verendi, clarissimi, doctissimi domini Doctores & Pro-
 fessores, Præceptores ac Benefactores in æternum colendi,
 studiosi nobilissimi, lectissimi, amici integerrimi, nullū es-
 se animal, quod tantis laboribus, tantis curis ac sollicitudi-
 nibus, ac tam tardè formetur, perficiatur, nascatur, quàm
 miserum hominem. Nam si nos ad illius ortum converta-
 mus, quid illius nativitate periculosius? Animantes, quan-
 do nascuntur, sine interitu matrum progignuntur. At nos
 miseri mortales, antequam videmur nati, fastidio doloriq;
 sumus: ipso partus tempore & nobis & matribus pericu-
 lum creamus. Bruta animalia, cum ex utero elapsa exci-
 dunt, si minus patres, à quibus procreata sunt, at matres sal-
 tem agnoscunt. In hominibus tantum abest ut idem fiat,
 sed potius ibi rationis & sensuū nullus est usus; lucē enim
 quando aspiciunt, ipsam à suppliciis auspicantur: alimen-
 torum necessariorum notitia destituuntur. Animalia verò,
 quantumvis pusilla, matris ubera lactis, aut campos pabuli
 gratia quæritant, aut è fimeto cibum eliciunt, & ad fontes &
 flumina potandi gratia se conferunt: idque non temporis
 progressu ab animali edocta discunt, sed statim simul at-
 que nata sunt, quæ necessaria, cognita ac perspecta habent.
 Non ita felices, quando nascuntur, homines existunt, sed
 edere, bibere, ambulare, se vestire, poscere, querere nescien-
 tes, & quod maximum, vix adpetere lactis alimentum sci-
 entes ac volentes. O miseriam humanæ naturæ! Singulis
 animalibus à naturâ suâ concessa sunt tegumenta, quibus
 eo facilius calorem depellere possunt æstivum, & frigus per-
 ferre hybernum.

Hęc verò omnia à nobis desiderātur, qui nudi & nasci-
mur & morimur, ne unicam quidem nobiscum vestem vel
adferentes vel auferentes : & si, vitā progrediente, veste ali-
qua uti velimus, ab iisdem pelles lanámque petere, in iisq;
operam & industriam exercere, necesse habemus. Mirum
igitur profectò non esset, si hæc & infinita alia enumerari
audiamus, fateri, nihil æquè miserum destitutúmque nascen-
di conditionem producere, quàm hominem. Si perpende-
remus corruptelam ex qua formati, immundiciem de qua
generati sumus, molestias innumeras cum quibus nasci-
mur, laborem immensum quo educamur, dolores innu-
meros cum quibus vivimus, & quod caput est, periculum
ingens cum quo moriendum est, futurum esset, ut in hac
meditatione mille causas mortem optandi, ac ne unam
quidem prolongandi vitam inveniremus. Unde non im-
meritò cecinit vir clarissimus, de literis literatísque meri-
tissimus, Joachimus Camerarius:

Non natum esse loco primo notabile & illud,

Non vidisse facis lumen Apollinea.

Proximum huic, natum citò trans Stygis ire paludem,

Pulvereóq; tegi corpus inane solo.

Nam desiderio vitæ non tangitur infans,

Et necis ex omni parte dolore vacat.

O miseram & fragilem humanam naturam ! o infeli-
cem vitam ! Quid vitam dicimus, cum mors potius dicen-
da sit, quam pro vitā mortales habent ? Quot enim, clarissi-
mi viri & magni principes futuri, in fascia mortui sunt ?
Quot dulcis vitæ exortes, & ab ubere raptos, abstulit una di-
es, & funere merfit acerbo ? Quid referam casus innumeros
extrinsecus homini formidandos ? imbres, tempestates, al-
luviones, tonitrua, grandines, fulmina, motus hiatúsque
terrarum, oppressiones ruinarum, tot venena fruticum, au-
rarum, serpentum ac ferarum ? Quæ incommoda patiun-
tur navigantes ? Quæ terrâ peregrinantes ? Quis, ubicunq;
con

confistat, non inopinatis eventibus subjacet? Quid videtur sedente securius? Sed tamen de sella, in qua sedebat, cecidit Heli sacerdos maximus, & mortuus est. Quibus omnibus admonemur, rerum humanarum celerem esse commutationem; neque in nobis situm, ut res perpetuò secundæ sint, verum utcunque fortunæ libitum fuerit, ita vel secundis rebus paulisper delinimur, vel adversis adfligimur, & omnia veluti æstuario quodam fluxu accedunt atque recedunt refluxu. Sed tristissimum visu est, tanto cum labore hominem educari, tanto sumtu statum adsequi honoratum, & cum minimè putamus, ita perire, ut nulla horum supersint aut perennent vestigia. Id quod paucis jam elapsis septimanis magno experti sumus malo, nobisque exemplum recens amplissimi viri, domini JACOBI POEMERI, Senatoris ac Scholarchæ laudatissimi, ob oculos versatur, cujus morte damnum maximum Reipublicæ Norimbergenfi allatum, & huic Academiæ, quam unicè amavit, dolori est. Civem enim amissimus sanguine nobilem, in prosperis moderatum, in adversis fortem, in ærumnosis patientem, in negotiis industrium, in consiliis prudentem, erga amicos fidelem, Reipub. amantem, & quod caput est, quòdque maximè admiratione dignum, qui nunquam vitâ quenquam offendit, nunquam linguâ quenquam læsit. O mortem acerbam & immaturam! O causam maximi doloris! Si tempus ullum unquam ad luctum nos revocare debuit, jam certè non leviter lacrymare, sed tanquam fontes lacrymarum profundere debemus. ¶ Cum autem perspicuum sit, fletum nostrum nihil omninò prodesse posse, potius animos & cogitationes nostras à lacrymis ad optimè defuncti POEMERI honestissimæ vitæ considerationem erigamus, & immortalis DEO gratias agamus, quòd talem nobis dederit Scholarcham, quem doleamus ablatum. Adeste igitur, quæso, animis omnes, & paulisper mecum fletum & lacrymas cohibete, dum breviter ea recenseo, quæ fuerunt in defuncto domino POEMERO nostro summo-perè laudanda, ut ad eius potius imitationem animos excitemus,

temus, quàm ipsum jam fato functum diutius lugeamus. Ut autem rem ipsam aggrediar, & ad defuncti laudes accedam propius, nullus dubito, quemquam ex vobis, auditores omnium ordinum præstantissimi, adesse, qui non statuat in laudando primam rationem à patriâ, nutriculâ dulcissimâ suavissimâque, imò potius ab ipsis parentibus, secundum Eloquentiæ Romanæ consulem, esse exordien-
dam. Est enim hæc omnium antiquissima & sanctissima ratio, quæ si cui honesta, clara, bonisque legibus & institutis formata cōtigerit, habet profectò in quo triumphet, & cur sese cæteris mortalibus beatum ac felicem prædicet. Nam etsi aliæ regiones & urbes aliis (sive occulta quadam vi nature, sive loci ac cœli ratione) virorum ingenio & virtute præstantium feraciores sunt: multū tamen momenti habet, & ipse cardo felicitatis humanæ in eo vertitur, ibi ut nascaris, ubi à primis annis rectè ad sapiētiam & virtutē educari, & omnium virtutum exempla laudabilia quotidie pænè ante oculos habere possis: id quod P O E M E R O, viro nobilissimo, rerūque politicarum usu præstantissimo, cū ipsius, tūm publico quoque bono contigerat.

Natus enim fuit N O R I M B E R G Æ, ea civitate, quæ inter cæteras omnes totius orbis tanquam Sol quidam fulgentissimus inter minora sydera relucet. Ex hac enim urbe sapientiæ principes innumerabiles exiere, in hac, ut cum Cicerone loquamur, alta est atque nutrita ratio; ad hanc urbem, tanquam ad bonorum omnium fontem, populi ac nationes undique confluunt, & quicunque aliquid videre ac cognoscere cupiunt, huc se conferunt. Sive igitur aliquis ad literarum cultum, sive ad politos hominum mores, opes ac splendorem urbis respiciat, non injuriâ exemplar civitatis benè constitutæ Norimbergam perfectissimum appellaverit.

Commodū autem frui vitæ hujus usurâ sub id tempus coepit, quo jam restaurata erat religio sincera ac incorrupta, anno millesimo quingentesimo sexagesimo primo, die vigesima sexta mensis Febr. Eo, inquam, tempore natus fuit,

fuit, ut, quid ad summam dignitatem felicitatémq; consequendam illi deesset, non adpareret. Nam toto vitæ tempore, quod rarissimum omninò est, non modò majoribus suis, qui & honoribus & rerum gestarum gloriâ semper maximè floruerunt, similis fuit; sed etiam eorum memoriæ laudibúsque maximam lucem attulit.

Parentibus, & honestatis, pietatis, ac nobilitatis laude florentibus, Scholarcham hunc natum esse accepimus. Patrem quidem perspectâ vitæ integritate virum, **WOLFGANGUM POEMERUM**, Secretarium Duumviralem, quondam Reip. Norimbergensis laudatissimum habuit; Matrem verò foeminam nobilissimam, omnibus virtutum ornamentis, quæ in hoc sexu prædicari possunt, condecoratam, **ANNAM TUCHERIANAM**. Quod quam vim habeat, quàmque animos non degeneres ad res magnas & majorum suorum gloriâ dignas instiget, excitet, impellat, nemini, credo, est obscurum, & exempla adduci possent plurima. Verùm ea non requiritis, & hic **POEMERUS** noster reipsâ ostendit satis, quàm non degeneri sanguine aut projecta stirpe ortum duceret.

Quemadmodum autem illi, qui excelsa, magnifica, spatiosa ac speciosa extruere volunt ædificia, in ponendis fundamentis summam adhibere solent curam & diligentiam: (ubi enim minus solida sunt fundamenta, periculosa sunt superstructæ fabricæ. Ædes enim, si ruinosa habeant fundamenta, ab impulsu etiam leviusculo subvertuntur & evertuntur:) sic eadem ratione parentes, qui aliquando liberos suos ad dignitatis & honoris fastigium evehere fatagunt, facere debent, ut à primis statim unguiculis, si qui benè nati fuerint, rectè educant, alioquin facilè in pejorem partem deflexuros. Paucos enim, ut ait Vegetius lib. 30. viros fortes natura procreat, bonâ institutione plures reddit industria.

Adfectum igitur paternum erga filium in tenella ætate **WOLFGANGUS POEMERUS** hunc declaravit, ut, cum veræ religionis ac pietatis esset studiosissimus, unicè studuerit,

duerit, & votis expetierit omnibus, ut illi pietate quàm similimus evaderet filius. Itaq; cogitans illud Aquinatis poetæ dicentis:

*Gratum est, quod patriæ civem populòq; dedisti,
Si facis ut patriæ sit idoneus, utilis agris,
Utilis & bellorum & pacis rebus agendis.*

Plurimum enim intererit, quibus artibus aut quibus hunc tu moribus instituas. Cùmq; sciret parens, hominum ingenium à labore esse proclive ad libidinem, ad malum pleno ferri cursu & impetu, tantòq; magis quanto quisq; est ingeniosior, nisi excolatur (mundus enim diversorium est Circes, in quo nisi aures cera, ut Ulysses, occludamus, in scopulos medio nos ducet in æquore navis) idcirco tam intra domesticos parietes, quàm patriæ literario in ludo Laurentiano ita erudiri eum curavit parens, & præceptoribus fidelibus demandavit, ut ornamento & splendori eum futurum familiæ illi statim eluceret. Nam ex omnibus virtutibus heroicis præstantissima judicatur ea, quæ beneficium aliquod in Remp. complectitur, & hoc tempore ad veram pietatem & futuram vitam assuefieri debent liberi. Venaticus enim, ex quo cervinam pellem latravit in aula, militat in sylvis catulus, ut ait Horatius. Porro perpendens parens, domesticâ institutione non perinde feliciter proficere filios solere, præsertim ferventiores & studiorum cupidiores, paternum in illum animum ulterius declarare cupiens, ad uberiores, pleniores & perfectiores vivendi discendiq; rationem consequendam, cum annum ætatis complevisset undecimum, eum Altorphium ablegavit; in quo laudatissimam Romanorum consuetudinem secutus est. Olim enim, auditores præstantissimi, Romanis lex erat sanctissima, & consuetudo longo usu confirmata, ne quis civis, qui Romana libertate frueretur, filium, ubi decimum ætatis annum excessisset, per plateas vagabundum discurrere pateretur. Mos siquidem erat Romanis, ut ingenuorum

nuorum filii usq; ad secundum ætatis annum lactarentur, ad quartum usque legendi, ad octavum scribendi, ad decimum Grammaticæ initiis imbuerentur. Elapso decennio, adolescentes necesse erat certum opificium discere, animūque vel ad studia literarum, vel ad res militares adjungere, ut ne Romæ ociosi vagarentur. Nam ea discere oportuit juvenes, ut refert Laertius, quæ viris usui futura essent. Et quidem rectissimè; pueritiæ enim tempus studiis est omnium aptissimum atque accommodatissimum. Tenella ætas, cū instar cere mollis fingi & refingi, instar arbusculę tenerrimę flecti & reflecti possit, non difficulter & addiscit & memoriâ comprehendit ea omnia, quæ scire & facere operæpretium est. Nec ulla vitæ humanæ pars vel tolerantior laboris, vel disciplinæ capacior est. Et secundum Phocylidem in præceptis moralibus: Cum adhuc tener gnatus, generosis instruendus est moribus.

Cum jam huc pervenisset, statim in familiam D. GLACIANI, Oratoriæ facultatis, piæ memoriæ, Professoris præstantissimi, adscitus, & inter eos, qui domestici & familiares tanti viri erant, educatus maxima ex parte fuit SCHOLARCHA noster. Et hanc quidem educationem, ipsum in præcipua parte felicitatis suæ in hac vitâ posuisse, sæpissimè ex ore eius audivistis vos Professores clarissimi. Cum igitur educatio arx sit & caput veræ virtutis, & solidæ gloriæ consequendæ initium, quî fieri potuit, ut, benè jactis fundamentis, tam præclara laudabilium studiorum opera non superstruerentur?

Ingressus Musarum domicilium summam dedit operam, qua ratione quove modo paternis admonitionibus daret locum, considerans diligenter quantis sumtibus hîc aleretur, quantis laboribus quantisque curis à suis præceptoribus institueretur, ac bonis moribus informaretur: illa etiam perpendens, quæ M. Tullius exordio suorum officiorum non obscure à literarum cultoribus requirit, unum ut præceptorem doctissimum docentem audiant, alterum ut cum diu audiant, tertium ut in Rep. præclara illum audi-

ant: ita enim fieri posse, ut Doctor scientiâ, Resp. verò exemplis discipulum augeat. Quod consilium sibi amplectendum maximè proposuit dominus P O E M E R U S, ut eò doctior & politior domum redire, nec solum eruditionem, verum etiam humanitatem & alias virtutes (de quibus inferius nobis agendum erit) reportare posset. αἰχρὸν γὰρ δηρὸν τε μένειν κενεόν τε νέεσθαι. Tanto autem flagravit discendi desiderio, ut non solum per unum aut alterum annum studendi caussa hîc commoratus fuerit, sed totum ferè septennium: quo temporis spatium ita se gessit, ut non solum omnibus condiscipulis, quos eo tempore habuit, acceptus atq; gratus fuerit, sed etiam suâ diligentîâ & assiduo studio omnes facilè superaverit. In pleno enim studiorum curriculo, ad solidam virtutem & eruditionem properans, quamprimû ad discendas artes animum adplicuit: & cum heroico quasi ingenio præditus esset, judiciôque non præpedito valeret, celeres quidem progressus fecit, ut cum æqualibus non, quod dicitur, velis remisque navigaret, sed & quamplurimos multis parasangis post se relinqueret, his præiret & eos anteverteret. Imò verò, cum G E O R G I U M G L A C I A N U M, virum sempiternâ memoriâ dignissimum, & de hac nostrâ Academiâ, imò etiam ferè de totius Reip. Norimbergensis laudatissimæ Senatoribus omnibus præclarè meritum, præceptorem haberet, ejusdémque lectionibus interesset frequentissimè, & ab eo diligeretur maximè; tantos progressus in studiis inferioribus fecit, ut laudabilis suæ diligentîæ in studiis adhibitæ luculentum reportaret testimonium. Ut autem mens humana intelligit, nos omnes, & cuncta, quæ in hac visibili cœli terræque machina continentur, non frustrâ condita esse, sed omnium actionum nostrarum ad archetypum & architectum nostrum referenda esse principia: sic & finem certum vitæ proponendum sibi arbitrabatur S C H O L A R C H A noster, in quo totus perseveraret, viveret & immoraretur, ac ita actiones suas omnes compararet, ut, huius vitæ defunctis aliquando periculis, commearet ad beatitudinem illam perennem,
nullis

nullis temporum metis ac finibus circumscriptam, atque ita finem studiorum direxit suum, ut ad sacratissimarum legum scientiam semet totum converteret, & huic uni inhaereret maximè. Quo in studiorum genere cum & re & nomine Jurisconsulti, Doctoris JOHANNIS THOMÆ FREIGII, piè defuncti, & aliorum Professorum, quos eo tempore hæc Academia habuit, opera uteretur: & non tantum publicè docentes audiret, sed multò magis ex illorum familiaribus sæpius factis congressibus judicium informaret suum, & legum adplicationes ad usum fori addisceret, factum est, ut illarum controversias perciperet ille rectius atque melius. Ante omnia enim (ut Quintiliani verbis utar) cui in publica celebritate vivendum est, assuescat jam à tenero non reformidare homines, neque illâ solitariâ & velut umbratili vitâ pallefcere. Attollēda mens semper est, quæ in huiusmodi secretis aut languescit, & quendam velut in opaco situm contrahit, aut contra tumescit inani persuasionē. Necesse est enim sibi nimium tribuat, qui se nemini comparat: adde quòd domi ea solum discere potest, quæ ipsi præcipientur, in scholis etiam quæ aliis, audiet multa quotidie probari, multa corrigi, proderit alicuius objurgata desidia, proderit laudata industria, unde excitabitur æmulatio, turpe ducet cedere pari, pulcrum superasse maiores. Veterum memoriâ si præclarum fuit, Athenis, in disciplinarum omnium altrice, & totius Græciæ celebratissimæ ac foecundissimæ procreatrice, studiis operam dedisse, quis, quæso, non magnifaciat, se discipulum & auditorem fuisse talium ac tantorum virorum sedulum & diligentem, maximè ubi felici studiorum exitu, ut quidem huic domino POEMERO accidit, ad metam pervenerit optatam, honorésque & opes consecutus sit? Nam certò æstimandum est, non fortè fortuna fieri, si quis bonos in primis annis consequatur præceptores, ingenii ac morum informatores egregios. Expertum enim est, & cum stomacho sæpè, non plebeiorum solùm educationi malè vulgò consuli, quibus tamen, quòd vim literarum nesci-

unt, ignoscendum fortè sit: sed & magnorum hominum filios insulso alicui Phaëthonti, aut alioquin imperito & ignoto homini, qui foedis nonnunquam vitiis deditus sit, temerè committi; ut non mirum sit, vel hoc solo nomine præstantium virorum liberos noxæ, quod vulgò dici solet, esse. Quomodo enim alios delinquentes arguent pædagogi, cum iisdem delictis sint quàm maximè obnoxii? Qua ratione virtutem aliis commendabunt, quam ipsi averfantur & refugiunt pessimè? Hi, si quid moneant, furdo narra- bunt fabulam, audiéntque continuò illud: Tu ubi adbibisti plus paulò, perii quæ mihi narras facinora: vel illud, quod cancer apud Æsopum matri, hortanti ut rectâ viâ in- cederet, respondisse fertur: Faciam, mea mater, si te idem facientem prius videro: ut hîc cum Thoma Sagittario ex tractatione de præparatione adolescentis loquar. Nihil au- tem mirum, si postmodum feratur equis auriga, nec audiat currus habenas. Nihil mirum, si virtutis & honestatis con- temtio, Rerum publicarum everisiones, stupra, adulteria, scelera denique omnia proficiscantur. Huius pravi institu- ti quæ causa sit, vobiscum, auditores omnium ordinum, splendidissimi, disquiratis. Ego sicco pede præteribo, ut re- deat ad id, à quo paululum digressa est, oratio.

Quemadmodum autem non satis est, si iter in animo habeas, expeditè limen egredi, sed ulterius & ad metam contendere oportet: sic SCHOLARCHA noster, absoluto linguarum ac aliorum studiorum suorum curriculo, non stationarius fieri voluit, sed censuit continuandum esse stu- dium, si quid vellet proficere, cogitans illud Scaligeri: Ni- hil esse beatius quàm scire, nihil divinius quàm docere, ni- hil propius veræ felicitati quàm discere. Et ad rectas sen- tentias animo imbibendas, & mores informandos, cum conducere intelligeret peregrinationem maximè: ad alias etiam Academias perlustrandum, ac excolendum ingeni- um, TUBINGAM primò profectus. Et quidem rectè. Quomodo enim morum elegantiam addiscemus tandem, & nobis comparabimus, si semper fornaci assideamus no-
stra,

stræ, & tanquam claudi futores domi delitescamus, aut ceu cochleæ cornua nostra nunquam extra testam exeramus? Tandem, ubi ita visum fuit parentibus, relictâ TUBINGA, ad exteras regiones se contulit, intelligebant enim parentes, quo studium majus & diuturnius, eò & ad prudentiæ uberiores copiam consequendam facere melius, & demum multo prudentiam surgere ab usu. Humiles enim istæ sunt & plebeia animæ, quæ domi resident, & adfixæ semper sunt suæ terræ. Illa divinior est, quæ cœlum imitatur, & motu gaudet, ut loquitur Reipublicæ literariæ princeps, Justus Lipsius, lib. 1. Epist. 22. Est enim hæc res profectò homine libero dignissima: varias lustrare provincias ac regiones, celebres invisere civitates, multarum nationum mores ac vitas ediscere, sinus, portus, promontoria, montes, flumina, maria, Chersonesos, insulas, loca denique quæcunque sunt insignia, diligentissimè cognoscere. Nihil enim hac prudentiâ fieri potest ornatius. Hinc inter alia encomia, quæ ab Homero, poëtarum Sole, Ulyssææ prudentiæ tribuuntur, non est postremum illud, quod, ut ipse ait, *Πόλλων ἀνθρώπων ἰδεῖν ἄστεα καὶ νόον ἔγνω.*

Unde sæpius ab eodem salutatur *πολύτροπος*, quòd varias easque remotissimas regiones populòsque non solum viderit, eorundemque mores observârit, historias linguasque indagârit: verum etiam, ubi usus sic postulasset, eadem illa ad suum suorumque commodum usurpare sciverit. Et certè, si omnem hanc rem ad rectæ rationis lancem altius examinare volumus, nihil verâ & legitimè institutâ peregrinatione honestius, nihil utilius esse reperiemus. Honestatem demonstrant tot Clarissimorum, sive prisco, sive nostro ævo susceptæ peregrinationes: confirmat honestissimus suscipiendorum periculorum finis, quem sibi proposuerunt: convincit laudatissimus boni publici amor & cupiditas, quod unum tantis ac tam periculosis itineribus ivêre petitum. Ut enim illos solùm, qui à sapientia olim, hodiè à sapientiæ studio philosophi adpellantur, mea levi-

ter

ter attingat oratio; Quis nescit divinum illum Platonem, magnum Pythagoram, Democritum aliosque quamplurimos, relicto genuino illo artium & doctrinarum domicilio, Græciâ, non ad cultos & eruditos populos solum, verum etiam ad ipsos Barbaros peregrinatos fuisse. Quos quidem sapientissimos viros, si de causa tantorum itinerum, tantorumque periculorum, interrogemus, haud dubie tantam in se alacritatem, summam illam discendi cupidinem excitasse respondebunt. Neque enim hic laudem merentur ii, qui tantummodo vagantur, lustrant, discunt, quod cuiusvis est: sed qui norunt disquirere, indagare, hoc est verè peregrinari.

Sed dicat quispiam, nulla fortassis utilitas ex tali peregrinatione erit expectanda? nullum inde commodum ad Remp. redundabit? Sed potius mali mores ex aliis regionibus huc advehuntur? Equidem ut non negandum, quin eiusmodi quandoque evenire possit: ita illud omne ab animo, ad veræ pietatis & honestatis studium informato, quàm longissimè abesse omnino statuendum. Ut enim Solis radii, per obscœna & lutulenta loca meantes, propterea non obscurantur: ita nec mens proba improbis istis moribus, quos interdum videre aut audire cogitur. Verum cum, ut dixi, peregrinari nihil aliud sit quàm discere: disciplina autem omnis in prudentiæ potissimum sapientiæque & morum studio sit occupata, sequitur, peregrinationem ritè susceptam eadem illa spectare debere. Quid enim certius est quàm inspectionem tot populorum, instituta illa gentium tam varia, ritus morésque hominum, formas Rerum publ. ac civitatum, permagnam vim habere ad iudicium & prudentiam. Sunt enim suæ quibusvis locis ac regionibus peculiare historia, mores, bella, casus, eventus magis insignes: quæ omnia si sint non solum visa, sed & notata, retenta, & collata quadam examinis lance, non possunt non augere civilem illam prudentiam. Scientia autem quin & ipsa peregrè inveniri possit, nullus dubitat. Per naturam enim ita comparatum est, ut nulla tam foecunda terra

terra sit, quæ omnia unâ habeat aut ferat: suum cuique peculiare lumen est, quo præfulgeat. Elegantia denique morum & comitas quin apud exteros potius quæratur ac in Germania, nemo est qui nesciat. Unde enim melius disci potest, quod deceat in cultu externo, vestitu, gestibus, qui lepores, quæ veneres in sermone, quàm à politioribus illis gentibus, Gallis, Italibus, Hispanis, Anglis, ut taceam interim, laudatissimum linguarum studium, quæ commodissimâ & expeditissimâ viâ suis in provinciis & addiscuntur & exercentur. Ex quo patet, peregrinationes, ritè institutas, non solum honestissimas, verùm etiam utilissimas esse.

Hisce rationibus motus est dominus POEMERUS, & probè etiam perpendit Isocratis illud, omnibus, qui graventur suscipere molestias ad viros præclaros audiendos com-
meandi, saluberrimum: μή κατόκη μακρὰν ὁδὸν πορεύεσθαι πρὸς τοὺς διδάσκοντες ἡ χρησίμους ἐπαγγελλομένους. αἰχρὸν γὰρ, τὰς μὲν ἐμπόρους τηλικαύτα πελάγη διαπερᾶν, ἐνεκα τῶ ἀλείω ποιῆσαι τὴν ὑπάρχουσαν εἰς αὐτὰς δὲ νεωτέρους μηδὲ τὰς κατὰ τὴν πορείαν ὑπομένειν, ὅτι τῶ βελτίω καταστῆσαι τὴν ἑαυτῶν Διόνοισιν. Sicut autem Sagittarii, si nullo præfixo scopo temerè suas emittunt sagittas, aërem, pulsant & ventos, metam, nisi casu fortè, non attingunt: sic quî tandem & hi aliquid proficient, qui temerario duntaxat motu & raptu potius ad extremos etiam Indos volitant, incerti quo & cur ferantur. Et ut in naturâ nihil est frustra: sic & in omnibus actionibus hic noster SCHOLARCHA certum sibi proposuit finem, semperque unicè hoc studuit, qua ratione sapientiam & prudentiam sibi comparare posset: quæ duo quàm egregiè sit consecutus, declaravit adventus in patriam dulcissimam, & ad dignitatum ac honorum culmina promotio & experientia testis, & maximum, quod ex illis percepit hætenus patria, commodum. Non solum enim regiones exteras ingressus, sed etiam omnia, quæ illi aliquando possent esse utilia, annotavit, observavit, memoriæ mandavit: ac tandem, cum federet ad Reip. Norimbergensis gubernacula, ad vitæ usum accommodavit, & apud alios, quoties dabatur de ejusmodi rebus

colloquendi occasio, tantâ cum gravitate ac verborum pondere elocutus est, & repræsentare aliorum populorum mores, Rerum publ. formas, instituta gentium varia, ritus morésque hominum ita valuit, ut jurasses, regiones ipsas tibi ante oculos esse positas; cuius rei mihi hac in parte testes possunt esse locupletissimi clarissimi domini Professores.

Elapso triennio ex Italia in patriam rediens Vir Amplissimus J A C O B U S P O E M E R U S, perceptis ex priore peregrinatione utilitatibus, majorem etiam partem Germaniæ perlustravit. Et ut animus humanus, si semel alicujus rei præclaræ dulcedine capitur, non quiescit nisi prius adeptus fuerit, suas res etiam in illo itinere ita instituit, ut, ex antlatis itinerum laboribus, redux Reipub. emolumento, parentibus honori, & toti denique civitati laudi esse posset, quæ spes illum nullo modo fefellit. Posteaquam enim reversus magnâ cum gratulatione multorum exceptus fuit, multi præclaram illius doctrinam & profectus suspiciebant, admirabantur & magnificiebant. Hinc videre licuisset, qua fide, qua vigilantia & dexteritate, reversus negocia commissa tractârit, qua contentione animi omnibus prodesse & commodare studuerit, qua moderatione omnibus, ipsius & opem & auxilium implorantibus, præstò fuerit, adeò ut nullo non loco & tempore, suscipiendo labores quoscunque, officio (de quo paulò inferius) functus suo sit, ut inde maxima laus ad eum redundarit, commodum & utilitas publica plurimorum emerferit atque resultârit. Cùmque in hoc virtutis & sapientiæ studio, tum privatim vivendo, tum publice agendo, nomen eius inclaresceret plurimum, tanto sibi primates adjunxit favore, ut ob elegantiam morum & judicii dexteritatem certatim qui ejus promovendi curam susciperent.

Cum etiam intelligeret prudentissimus vir, conjugio Rempublicam salvam & incolumem conservari, augeri, atque legitimâ progenie honestè propagari, imò sine illo nec stare quidem posse, multò minus vigere & accrescere, matrimonium contraxit: Quod etiam ei tam felix contigit,

git, ut ne voto quidem melius sibi fingere potuerit. Conjugem enim invenit suo ingenio & moribus aptissimam, Barbaram, amplissimi viri ac senatoris olim Reip. Norimbergensis, MATTHIÆ LÖFFELHOLTZII, filiam, cum qua etiam amantissimè & suavissimè annos viginti & aliquot menses vixit, ex eâque filios duos, WOLFGANGUM-JACOBUM & ALBERTUM, adolescentes egregios & ad optima quæque natos, unâque filiam, BARBARAM-SOPHIAM, moribus bonis exornatissimam, genuit, quos superstites cum matre reliquit.

Hic jam non dicam, auditores præstantissimi, quomodo se in familia (quæ quasi parvæ Reip. imaginem refert) regenda præstiterit. Nihil dicam de prudentia qua usus, de gravitate ac moderatione, ne digressio præter rem fiat, & à proposito longius abducatur oratio, & opus Iliade majus nascatur.

Cum autem ingenio & mentis acumine admirabili, judicio recto, memoriâ expeditâ & fideli præditus esset, laboris supra modum patiens, & in rebus subitis, quod Thucydides Themistocli tribuebat, promptè & sine hæsitatione consilia optima inveniret, de futuris *εὐστόχως* & prudenter conjiceret, in præsentibus se feliciter expediret, ignota diligentissimè inquireret, sic ut nihil tam obscurum aut dubium esset, quod ipse vel nō erueret, vel quasi è specula multò antè videret, fiebat omninò, ut statim à nuptiarum solennitate peractâ in judicium, seu, ut vocant, Scabinorum numerum cooptatus fuerit. Huic autem functioni omne suum studium, operam & laborem, adeoque se totum devovebat, utpote qui ex Platonis ad Architam epistolâ didicisset, neminem sibi esse natum, sed ortus nostri partem sibi vindicare patriam, partem cognatos, partem reliquos amicos. Quare cum in eo totus esset, ut vitam mortalium publicè & privatim suo loco fulciret, hancque *μεγαλειότητα* ad illud officium & singulos privatim juvandos adferret, non poterat non summâ omnes, qui vel operam vel consilium eius expeterent, humanitate ac benevolentiâ

tia complecti; ita quidem, ut nemo ferè, qui æquum peteret, animo tristi, fronte contractâ ab eo discedere visus sit. Omnes enim ipse non benignè solū audivit, sed & ita comiter responsum dedit, ut, in tanta negotiorum & interpellantium multitudine, blanda & perpetua illa adfabilitas, ac patientia summa, multis admirationi esset, quo fiebat, ut domus eius non tam humiliter natis, quàm præclaris parentibus ortis hominibus esset perpetuò refertissima. Ibi visi sunt alii intrantes, alii exeuntes, alii hunc circumstantes, quibus omnibus facilimè celerrimeque satisfecit. Ex quibus, quanta in hoc viro consilii copia, eloquentiæ vis, laborum tolerantia, & quàm constans humanitatis & comitatis studium fuerit, intelligi nullo negotio potest.

Quemadmodum autem virtus & doctrina in obscuro esse non possunt, & mediocres honores tempus auget, immodicos abolet, ut prudenter Theopompus Pyliis rescripsit: sic POEMERUS noster super pauca fidelis, super multa constituendus, diutius latere non potuit.

Ad dignitatem Senatoriam omnium bonorum suffragio ac calculo fuit evectus. Hinc veniendum erat in Senatum, ubi de maximis civitatis rebus est agendum, veniebat illicò optimarum sententiarum autor.

Demandabatur illi præterea eleemosynarum præfectura, ut laboris plenissima, sic laudum ornamentis abundantissima. Injungebatur illi etiam cura sylvarum. Nihil hîc de SCHOLARCHATU & aliis muneribus multis, quibus per aliquot annos summâ cum laude præfuit, commemorabo. Quis igitur non miretur, unū hominem tot rebus tamque diversis sufficere potuisse? Suffecit: &, quod admirabilius est, post tot labores & vigilias, promptior & alacrior continenter adparuit. Ex quo est manifestum, quantis virtutibus hunc virum instructum fuisse oporteat; de quibus, ut virtutis ingrediamur theatrum, quæ in officiis cuiusque mores & ingenium prodit, &, ut ex sapientibus quidam dixit, virum demonstrat, breviter aliquid dicam; &, ubi quædam de illius discessu ex hac misera & conclamata mun-

mundi fenectâ ad coelestem & sempiternam vitam dicta fuerint, perorabo : id quod dum facio, quæso vos, auditores præstantissimi, pro incredibili humanitate vestra, ut me, sicuti facere instituistis, benevolè audiatis.

Hisce jam in dignitatibus ac honorû fastigiis constitutus, atque divinitus à DEO Optimo Maximo collocatus dominus POEMERUS, omni studio in id incubuit, ut imprimis DEO Optimo Maximo satisfacere, quantum vires humanæ imbecillitatis ferrent, posset, non ignorans magistratus dignis virtutibus anteire universos debere : quum plura possideant, quæ amittere possint, quàm universi. Ideoque magis quàm cæterorum quenquam oportere DEO servire, secundum illud Nazianzeni : Qui magna cōsecuti sunt, magnis etiam DEO sunt obstricti nominibus. Quod, ut & alia quamplurima, optimè secum perpendens amplissimus noster POEMERUS, in eo desudavit maximè, ut, quantum fieri posset, quàm proximè ad ipsius imaginem, cuius umbram in hac terra gerebat, accederet.

Neminem autem sine vera pietate veram posse habere virtutem, luce meridiana est clarius. Ut autem metallorum omnium præstantissimum est aurum, & magnorum sæpè laborum præmium : ita præclaræ pietatis actiones cætera omnia quæ sunt in homine superant, atque in eis omnium virtutum laudes consistunt. Omnium enim primum, ut erat diligentissimus pietatis ac religionis cultor, quæ ad DEUM resque divinas pertinebant, ea sibi curæ & cordi intimè esse volebat. Eum enim in finem ficti & inspirati à DEO sumus, non ut cælum videremus & Solem, sed ut horum artificem coleremus. Quàm diligentissimè dominus POEMERUS hoc observaverit, ex eo adparebit abundè, quod pauperibus succurrerit, afflictis patrocিনatus, pro chotrophæa visitaverit, templa frequentaverit, & sacris audiendis intentus fuerit, quæ omnia quàm fideliter præstiterit, nemini arbitror esse ignotum. Et harum suarum actionum non tantum præmia recepit, quòd eas exercue-

C 3 rit,

rit, sed gloriam etiam inde consecutus, quod præclaro suo exemplo invitati alii quoque fecerunt.

Quantâ etiam diligentia, quàm indefesso studio & cura munera publica sibi demandata expedierit, quàmque laudabiliter ea gesserit, scit universus Reip. Norimbergen-
sis populus. Sciebat talem se debere esse justitiâ plenum, si aliis jus administrare vellet. Unde Plinius in quadam epistolâ dicit, cum provinciæ cuidam in Africa præflet, interrogatum à se virum natu grandem, & in gubernatione spectatum, quidnam ad benè administrandam justitiam factu opus esset, respondisse: Si bonus justitiæ minister esse cupis, in teipsum exerce. Boni ac justi enim viri est, rectâ vitæ suæ virgâ metiri Rempublicam. Et porrò addidisse: Si adversus homines rectus, adversus deos purus esse vis, munere ne insolescas cave. Rempublicam administrantes, & superbiâ fastûque elati, modum sæpenumero neque in verbis tenent, neque in actionibus servant. Hoc non solum audivit, sed & justitiæ defensor extitit acerrimus SCHOLARCHA noster. Cuius actiones per totam vitam disseminavit in omnes. Hic enim defendebat commune bonum, innocentum patrocinium suscipiebat, sublevabat ignorantes, corripiebat culpatores, virtutis amantes honorabat, juvabat orphanos, pauperibus favebat, coercerebat homines quæstui ac lucro planè deditos ac emancipatos, deprimebat ambitiosos: deniq; quod cuiq; debebatur jure, id illi reddi curabat, quicq; injustè quippiam possiderent, eos è possessione exturbabat. Cogitabat quotidie & crebris usurpabat sermonibus, arduam sibi provinciam esse delegatam, quâ nulla gravior, nulla quæ plus ingenii, consilii, prudentiæ, laboris & industriæ, tam in dicendo quàm cōsulendo requirat. Oportet enim talem virum, veluti aliquem Argum, in omnia intentum esse, providere, curare, dirigere, nunquam profundioris oculis somnum, de sententiâ Æschyli, admittere.

Porrò præter prudentiam & circumspersionem summam, tanta in POEMERO nostro fuit ad labores promptitudo, tanta in negociis industria, ut nullum sibi diem à negociis

gociis vacuum relinqueret, facerétque omnia (sæpè enim hoc dicendum est, quoniam in ejusmodi viris rarum) non gravatim, morosè, aut animo invito, sed promptè, comiter & voluntate summa. Neutram enim in se desiderari passus fuit, quòd hanc fidei, illam humanitatis suæ esse judicaret: quam qui in rebus gerendis non adhibet, etiamsi officii quid fortè præstet, austeritate tamē omnem facto gratiam adimit, ut rectè omninò Seneca dixisse videatur: Beneficium, ab homine duro asperè datum, esse panem lapidosum, quem esurienti quidem accipere necessarium, comedere verò acerbum sit. A quo vitio tantum noster P O E M E R U S abfuit, ut etiam nihil humanitate ac facilitate in magno & excelso viro, & præcipuè in Senatore præstantius inveniri posse statueret. Ideòq; cum hoc præclarè intellexisset, tam mansuetè, tam benignè se non tantum erga divites & potentes, sed etiam pauperes & abjectos gessit, ut eius modestiam, facilitatem, patientiam admirati sint omnes: amicis præterea admonitionibus fidelissimisque consiliis magis, quàm atrocibus minis, alios ad honestè rectèque vivendum impulit, & ad sibi parendum induxit: tamque comiter omnibus auxilium pollicitus est & præstitit, tam faciles ad se præbuit aditus, tam patiens in audiendis omnium etiam infimorum querimoniis extitit, ut ab eo nemo unquam, si fas erat, nisi contentus discesserit.

Cupidè enim summi pariter ac infimi consilia ejus sequebantur. Ita etiam æquitate temperare juris rigore solebat, ut, etiamsi erat maxima irascendi causa, nunquam tamen iratus ad poenam indicendam accesserit, id quod etiam adparet ex illâ, quam semper sepositam in veste habuit, schedâ, cui sequentia propriâ manu inscripserat verba: Tardos nos esse decet ad loquendum, tardiores ad judicandum, tardissimos verò ad damnandum. Et iterum: Priusquam perquisieris, ne crimineris: cognosce primum, atque tunc increpa. Priusquam audiveris, ne respondeas, & in medium sermonem ne immittas verbum: de re, quæ te non attinet, ne litiges: & in judicio peccatorum ne confideas.

deas. O sententiam verè aurèam, & dignam quam omnes memoriae mandent.

Erat etiam inprimis felix & assiduus in tractationibus, ubi hæreditates controversæ rationibus æquis cernendæ, animorum vulnera & offensiones virorum magnorum, persanandæ, aut denique affinitates inter summi ordinis homines glutinandæ essent, quo & fiebat, ut nihil ferè hujusmodi rerum in Norica diœcesi gereretur, quin ipse peculiariter ut arbiter adscisceretur, quo nomine non tantum Reip. Norimbergensi charus, populo gratus, & ornamento patriæ, sed & aliis, ad quoscunque pervenit, admirationi fuit. Theologiæ & sacrarum literarum erat studiosissimus, & controversa religionis negocia rectè intelligebat: quibus etiam omnibus, quoties usu veniret, adhibebatur. Quoties deplorare solebat, quod alię gentes ac nationes, etiam barbarę, summum conjunctionis vinculum haberent, religionem scilicet, id ipsum fortissimos Germanorum animos, ac proinde etiam vires distrahere.

Per totam vitam diligentissimè sacra Biblia & probatos eorum interpretes, maximè Lutheri ac Philippi virorum præstantissimorum, quorum similes Sol videbit nunquam, & aliorum saniorum Theologorum scripta legebat, ex iis selectissima quæque dicta ac sententias, quo magis in promptu essent, sibi describens, ab aliorum verò ineptorum mataëologorum deliramentis & stultissimis commentis abstinens.

Academiam verò hanc, tanquam singulare Reip. Norimbergensis ornamentum, constanti amore ac benevolentia prosequabatur: & si quid animo fortè providisset, quod ejus saluti obfuturum putaret, fideliter monebat, laborantique consilio suo præstò erat. Omnibus enim & singulis hujus Academiæ inclytæ Professoribus celeberrimis, quibuscunque poterat, studiosè promptèque opitulabatur. Quo enim vos studio, viri cordatissimi, dicite, quo amore, qua benevolentia est prosecutus? ut vos auxilio fovit! ut præmiis allexit! commendatione sustentavit! auctorita-

et auctoritate protexit! An non semper hujus viri domus vobis
patuit? atque omnibus aliis, qui virtute aliqua aut arte præ-
stabant, quasi commune quoddam fuit asylum? An non
ipse ultrò benignè omnes invitabat, & liberalissimè hospi-
tabatur? Quid si jam dicere vellem, quàm libenter vobis-
cum conversatus sit, quanta cum lætitia vestris colloquiis
doctissimis interfuerit, non verba sed dies deficeret; ad ea
enim tanquam ad suavissimum animi pastum & ocium
amoenissimum accedebat, sæpeque etiam dicebat: omnes
in hac vita res degustatas à nobis & possessas fastidium, sa-
tietatem & defatigationem adferre, solam autem docto-
rum hominum conversationem & veram scientiam sa-
tietatis, fastidii & defatigationis esse expertem, aut si quan-
do defatigari viderentur, oculi quidem legendo, aures au-
diendo, non tamen mentem cognoscendo fruendoque
delassari.

Cum primis etiam juventuti rectè prospectum cupie-
bat, eamque consilio, auctoritate & promotione, ubi opus
erat, sedulò juvabat: ut qui intelligeret plus in ea, quàm
vulgò putatur, momenti positum, adeoque fundamen-
tum salutis publicæ in ea consistere.

Quid dicam de avaritia, qua nihil magis denigrat atque
dedecorat familias illustres & viros nobiles, unde olim
δαρσοφάροι καὶ δαρσοδόχοι convicti infamia notabantur, quàm
longè scilicet ab ea dominus P O E M E R U S abfuerit? Non
attingam hîc, quàm sanctè & integrè se gesserit, quàmque
alienus fuerit ab omni corruptionis, non dico crimine, sed
etiam suspitione, neque enim pecuniâ se à recta sententia
dejici patiebatur: quin contrà quod semel rectum esse ju-
dicaverat, constantissimè, uti virum bonum decet, tueba-
tur: & si quid vel officii ratione, vel benignitate amplissimi
Senatus ad ipsum pervenisset, possidebat rectè: & de eo, ubi
opus erat, conferebat in aliorum usus libens, & sine sordi-
bus.

In vita privata nihil utique videre licuisset, quod vel
ab gravitate, quæ talem personam decet, vel humanitate,

quam sapientiæ filiam rectè olim dixerunt veteres, ullam in partem esset alienum. Erga uxorem suavis, comis ac humanus erat, liberos & familiam autoritate & gratia magis quàm metu alieno regebat, ita ut sibi quisque poenam gravissimam duceret, vel levicula etiam in re, quem oculis ferrent, & magnopere observarent, offendere. Itaque ad nutum præstò erant omnes: imò voluntatem ejus, conjectando quid vellet, sæpè antevertebant: qua animorum & officiorum in re familiari *συμφωνία* nihil sanè possit esse suavius, jucundius, utilius. Filios, quos supra enumeravi, in pietate morumque honestate, ad spem & laudem Ecclesiæ & Reip. diligentissimè, quàm diu vixit, educari curabat, & singulis sua exercitia pietatis distribuere solebat, sicut & peculiariter præceptores & formatores morum & studiorum illis constituebat. Filiam verò, cujus educatio non nisi ad matrem propriè spectare videbatur, neque hoc ipsa negligebat, exemplo tamen suo ad omnis generis virtutes, præcipuè verò amorem pietatis & lectionem Sacræ Scripturæ invitabat. Quidquid etiam occupationibus illis quotidianis detrahare poterat, libenter lectioni ac meditationi S. Scripturæ tribuebat.

Huc igitur eorum, quæ proposuimus, summa (ut extrema cum primis contexam) redit, illum patriæ patrem, fuisse verissimè, justum, fortem, DEI timentem, veracem, & omni turpi lucro inimicum, ejusque domum fuisse pulcerrimam & ornatissimam, in quam ingressæ erant virtus, eruditio, sapientia, honestas, gloria.

Exposito breviter vitæ amplissimi ac nobilissimi viri, domini JACOBI POEMERI curriculo, restat nunc ut sim promissi memor, & ad extremam hujus orationis partem & metæ viciniorem decurram, in qua de obitu illius pauca etiam commemorabo.

Ut autem de ipsius quoque à nobis ad beatarum animarum domicilium discessu demonstrem, constat verum esse, quod vulgò jactari solet, vitam, præclarè & laudabiliter actam, plerunque sine claudi glorioso & memorabili. Antequam

tequam enim è mundi hujus turbinibus evasit, & cœleste
diversorium cupidè intravit, sæpissimè repetere solitus: se
libentissimè mori velle, eo lætius, quòd non sibi succurre-
ret, quenquam à se tota sua vita læsum fuisse. Lætus ego mo-
riar (intelligitis verba defuncti) cum recordor, septende-
cim annis, quos Norimbergæ egi, semper me dedisse ope-
ram, ut prodessem Reipublicæ. Lætus denique moriar,
non tam ob commoda, quæ semper in homines à me sunt
profecta, quàm ob CHRISTUM DEI filium unigenitum,
quem semper colui, cum quo ita sum unitus, ut paratus sim
ubique locorum, quovis tempore, si me avocet, illum se-
qui, firmiter etiam credo me placidissimâ etiã morte hinc
esse emigraturum. Ita enim manibus me DEI commisi,
faciat ille quod sibi fuerit gratissimum. O vocem fiduciæ
ac misericordiæ divinæ plenissimam, & homine Christia-
no dignissimam! Cum igitur ad cœlestem gloriam ac-
quirendam & immortalitatem satis vixisset, evocatus hinc
fuit anno 1607, die Decembris secundo, quo manè prius
interfuisset concioni reverendi ac clarissimi viri, domini
M. JOHANNIS FABRICII, Ecclesiarum Norimbergen-
sium Superintendentis primarii, cujus auditor erat diligen-
tissimus, quémque etiam, cum propter verbi DEI puri-
tatem, quod jam per aliquot annos propagavit, tum
propter insignem eruditionem summo prosequeretur a-
more, propriâque luce habebat cariorem; cujus concione
finita, ut solebat, curiam adscendit, absolutis ibidem nego-
ciis publicis, domesticos lares resalutavit, cum cōjuge, libe-
ris aliisque, qui illi aderant, cibum sumsit, peractis precibus
pomeridianis propter quædam negocia tutelaria aliò vo-
catus, quibus expeditis domum denuò petiit. Cùmque
jam suum ingressus esset hypocæstum, circiter horam
majoris horologii primam, pro more solito amicè cum
uxore colloquens, illique, quid in suorum pupillorum ne-
gociis effecisset, enarrans, eheu! eo ipso momento Apo-
plexiâ correptus, mente integra, cum vixerat ferè annos
47. spiritum CHRISTO Servatori devotè, placidè, sineq;

gravi, ut sæpè optaverat, cruciatu reddidit. Cujus morte et-
 si Respublica Norimbergensis quassata est maximè, ac
 MUSÆ ALTORPHINÆ destitutæ mecænate beneficen-
 tissimo, & Ecclesia nutritore orbata benignissimo: benè ta-
 men cum eo actum; quoniam omnibus tandem miseriis
 liberatus, fiducia misericordiæ divinæ ac spe vitæ æternæ
 fretus, præparata in cœlo consecutus est præmia, & ibi lo-
 corum esse eum novimus, ubi non mœror illi sed lætitia,
 non dolor sed quies est, ubi non plorat sed ridet, non suspi-
 rat sed cantat, non cruciatur sed delectatur, ubi denique
 mortem non timet, sed vitam habet perpetuam. Etsi quo-
 que per ætatem & naturæ legem multos adhuc annos sum-
 ma cum utilitate & commoditate POEMERUS noster vi-
 vere potuisset, tamen non tam cogitandum, quid nobis
 commodum atque utile fuerit, quàm quid immortalī Deo
 placuerit, & quid ipsi expedierit. Nam

D. Conradus
 Rittershusi-
 us IC. in A-
 galmatogra-
 phia ex di-
 sterio Ger-
 manico;
 Gottes
 will ges-
 schicht/ vñ
 anderst
 nicht.

Fit quidquid fieri voluit divina voluntas:

Et decreta DEI tollere nemo potest.

Non fit, quod fieri prohibet divina voluntas:

Ergo reluctari quisq; caveto DEO.

Quod cum ita sit, viri omnium ordinum ac dignita-
 tum præstantissimi, virtutum exempla, quæ nobis reliquit,
 pro tenuitate nostra imitemur. Ideò enim DEUS præstan-
 ti ingenio viros ornat, ut alii, in eorum exempla intuentes,
 vita ac moribus exprimere illa studeant & imitari, & vir-
 tutis autorem ipsum DEUM agnoscant & celebrent.
 Quapropter:

SUMME pater, mentes populiq; Ducúmque, gubernas,
 Nate potens agmen posita Dux eripe fraudi,
 Spiritus afflatu da motum, & suffice vires.
 Tu rege conatus nostros, Pater optime, semper,
 Pieridum sacris adsis, cætumq; Scholarum
 Dirige, Pegasidas conserva numine turbas,
 Te sacrosanctum quantum decet ore canentes.
 O æterne DEUS, Dux unice, & unice victor,

O quam

O quantum & quoties non est numerare beatos.
Rebus in afflictis quibus es tu præstò patronus:
Quem penes est unum, vasti custodia mundi!
Adfer opem tanto quassatis turbine rebus.
Pelle famem, pestemque fuga, Martemque coherce,
Et causam defende tuam, tua gloria vincat:
Dum tua sincerè populo mandata professo
Non unus Pharaos ferrum minitatur & undas.
Da vires animis, da nescia pectora frangi.
Arma fide, superare doce pietate tumultus.
Ut queat insanis Ecclesia pressa tyrannis
Impositum perferre jugum, victrixque ferendo
Pace colens aliqua divino oracula verbi
In patria, sævi revocare catharmata mundi,
Et tandem ad cælum spretis evadere terris
Ante patrem aeternum CHRISTO comitante triumphū.

Dixi.



D 3


Ornatissi.

Ornatissimo juveni

CASPARI PANSAE, JURIS
STUDIOSO, ORATIONE FUNEBRI,
*publicè in Acad. Norica recitatâ, celebranti
memoriam*

NOB. AMPLISSIMI, PRVDENTIS-
SIMI, & (quid multa?) OPT. VIRI, Dn. JACOBI
POEMERI p. m.

*Reip. Norimbergensis Senatoris & Scholarchæ
meritissimi.*

 IDUM, Pansa, tui socium me adsume doloris,
Tristia POEMERI quo defles fata JACOBI,
Et nos officii in partem permitte venire.
Et nos, quæ luges, præstantia funera tangunt.
Sic fratrem fratri certantem patre perempto
Vidi, uter in manes esset pietate paternos
Officiosior, ac potiores laude referret.
Non tu, non alius fandi prior arte magister,
Vel si Arpinatis, vel si Demosthenis ora
Exuperet, POEMERI exæquet præmia laudum,
Celsa viri, spectata domi, spectata forisque,
Quas meruit virtus, & comis gratia linguæ,
Cui neque mens aberat non fictis consona verbis.
Facta sequebantur, si quid cui dixerat ille.
Raram ævo hoc ò rem, quod verbis ditius est re!
Sed POEMERA fides constans erat atque perennis,
Illabefactato nunquam temerata tenore.
Commemini, qualem pridem mihi præstitit ille
(Publica nememorem, cunctis notissima, gesta)
Affectum, uxori facerem cum funera fletu
Defunctæ, optarémq; venire terminus ævi
Et mihi (quippe esset cui jam grave vivere soli,

Imò

Imò nec toti, mediâ ceu parte recisâ
Cordis, humanda foret quæ me vivo atq; vidente)
Talia dixit virum ; (& laquearia conscia templi
Sunt ita dictorum, summum testantium amorem)
ABSIT, ut antè tibi veniat lux ultima, quàm me
Fata ferant mea ! Quin potius tua fata redempta
Ipse meis cupiam, si hîc permutatio detur.
O incredibilem summi vocem indicem amoris
Plus quàm fraterni, quem nil queat æquiparare !
Quid, Patrone, tuis meritis, P O E M E R E, rependam,
Patria queis abs te est cumulata Academiaq; isthæc,
Atque ego, mecum alii plures quoq; ? Non ego, non urbs,
Cujus nuper eras pars non postrema Senatus,
Non Academia, non quisquam tibi reddere dignas
Confidat se posse vices, ut ut omnia tentet,
Omnesq; induere in formas se quisq; laboret.
Officii verum esto genus, si posse negaro
Æquari laudésq; viri & merita ampla canendo.
At te, P A N S A, puto punctum tamen omne tulisse,
Communem luctum dum, quo potes, exprimis ore,
Communis nomen patroniq; eximis umbris.
Laudem, crede mihi, tali pietate mereris,
Quanquam laude omni est major Poëmeria virtus.

Conradus Rittershusius D.

MEMO.

MEMORIAE Dn. IAC. POEMERI,
SENATCRIS PATR. ET SCHOLAR-
CHÆ opt. τὸ μακρότις, sacrum.

D. Paul.
Colerus
Senator
& Schol-
archa.

SIC EST. In medio unda salo propulsat ut undam;
In vitâ cladi clades succedit, Amici.
Letho immaturo, fatis properantibus, eheu!
Exemptum vivis COLERUM Norica Musa,
Nec dum deflêrat, cum te, POEMERE, virente
Ævo florentem crudeli falce peremit
Immitis nimium, & nulli exorabilis unquam
Morta; virum Pyliis quem dignum censuit annis
Curia; quemq; Helicon optet superesse patronum,
Omnibus ominibus, quâ ALTORFI mœnia surgunt.
A teneris Phæbo & Musis, POEMERE, dicatus
Unguiculis: diæ Themidi maturior annis
Addictus, simul Historia, firmatus abundè
Dotibus ingenti, doctæ & moderamine lingua;
Atq; informatus præclaris artibus, inde
Perrexti magnis ad honores gressibus amplos.
Quando pro meritis factus pars magna Senatus:
Hanc pulchrè Spartam ornâsti, ut tibi patria alumno
Inciperet debere suo. Hinc pia cura Lyceii,
Quod famâ extollit clarum super æthera nomen,
Palladiisq; viris toto celebratur in orbe,
Demandata tibi: quæ laus næ maxuma stabit,
O POEMERE, tibi, cælo dum sidera stabunt.
Prætereà orphanicum rexti moderator amatus
Ritè gregem: tua quæ res multum encomia adauget.
Occidis, hæc curans cum curâ, & pectore fido.
Fila secant Parca. sed quid? Tibi janua olympi
Panditur, ut pede recto adeas cæleste Lyceium;
Curia summa patet tibi, quâ sapientia vera
Tractatur, lites absunt; quâ amplectitur omneis
Omniuus Genitor, posito qui corpore ad astra.

Deveni-

*Deveniunt, istic solidam pacemq, quietemq,
Inveniunt; nec enim hanc alibi reperire licebit.
Quæ tibi noster amor post fata sacra putavit,
O POEMERE, precor cui, molliter ossa cubare.*

GEORG. REMUS IC.
Lub. Mer. F.

SCAZONTES,

In obitum

NOBILISSIMI ET AMPLIS-
SIMI VIRI, DN. IACOBI POEMERI, SEN-
toris Norimbergensis, & Academiae Altor-
phinae Scholarchæ.

PR O H, Fata dura, dira, sæva, implacata!
Quid non furoris impii, iniqui, crudi
Patrâstis in nos hætenus? Ne dicam nunc
Antiqua, quorum multa sunt inamœna,
Quid non recens hoc vulnus ostendit scævi?
Ad quod mihi horret mens, fugit luctu,
Nec integrum vel nominare rellinquit.
Hei! Nil opus mihi nomine, in nefando isto,
Quod tangit omnes, ulcere. Hei! Non est fas heic
Deplere mentem, & nomen edere insanum,
Mali silentis. Sed quid hoc silenti sit?
Inclamat omnes publicè, privatim omnes,
Monens, ruisse solum & unicum fulcrum,
Et literarum, & literatùm penè omnium.

Nolo ominari: sed potius DEUM orabo,
Dignetur ille Nobis & Palæcomæ

E

Virum

Virum dare, usquequaq; POEMERO
Similem fide, pietate, zelo, candore.

*Ne asymbolos esset in publico luctu.
faciebat Casp. Hofm. Med.
Doctor & Professor.*

ΑΛΙΑ ΘΡΗΝΩΔΙΑ.

O MNIPOTENS nos dextra DEI sat Marte Togâque
Protegit: ast ventis non tibi sufflat opem.
Nam ceu magnificæ urbis sunt pomæria asylum,
Haud aliter docti, teste Platone, viri.
Destructo mæro, aut unâ domus orba columnâ
Corruit: urbs doctis sic quoq; Consulibus.
Cum locuplete penu, pomæria, fundamentum
Concors, si jungas; urbs bene septa manet.
(Tres Charites quasi sunt) medio sed nomine adempto,
Omine privata est sancta Catena suo.
Norica quod tellus, inopino heu! funere sensit
Nuper præclari, ô res lacrymosa! viri,
POEMERI, duplici qui nobilitate celebres,
Doctrinæ & generis condecoravit avos.
Proh dolor heu! præter spem lapsa mense Decembri,
Brumalisq; decem solstitii ante dies:
Divino haud fato renuens, animam expiravit
Sanctam, en, ætherei transit ad astra Poli.
Eximius, prudens, obit ecce, Scholarcha, Senator,
Musarum fautor, justitiæq; decus.
Fundite Noriacæ carmen lacrymabile Musæ,
Quas triplici hac mæstas, ordine, fata tenent.
Heu pietas! Themis alma eheu! tu cana fidēsq;
Funeream lacrymis ejā rigate togam.
Quis querulâ egregium hunc adiit quis voce Patronum?
Latius ovans rediit non nisi Mysta sacer?
De fidei articulis sanctas miscere loquelas,
Suadebat sanctæ religionis amor.

O frontem Charitum fragrantem nil nisi odore!
 Quantum erat ô! gravitas mixta lepore decus.
 Promptus ad Oraculum Themidis, sed tardus ad iram,
 Consul erat; doluit propter & omne nefas.
 Zoilo & haud patulas dedit aures, judiciûmq;
 Non prius auditus quàm sit uterq; tulit.
 Civibus ancipiti positus, sacra ancora, casu,
 Fatidici nec non Oedipi & instar erat.
 Exul, inops, ager, petiit si limina nostri
 Patroni, large mox stipis ara tulit.
 Sistite sed lacrymas iterum post funera, Musæ,
 Solamen lacrymis & modus esse decet.
 Non obiit, sed ad astra abiit, praeuntis Achates
 Quisque erit; in CHRISTO, portio grata Poli.
 En mala cuncta, hostes, pedibus calcantis Jacob
 Instar, & Israël nunc videt usq; DEUM.
 Inclyta sed penitus num tota subacta jacebit
 Gloria Pieridum, Pæmeridum anne domus?
 Sic DEUS haud voluit: Tu pars, WOLFGANGE, Lycei
 Cara Palacomes, Aonidûmque decus.
 Nobilis es stirpis tu flos, spes magna; Parentis
 Emula te virtus culmina ad alta vehet.
 Tu quoque Feldensis, quem Norica sceptrum tenentem,
 Gens pia ceu coluit, lustra per octo, Patrem.
 O venerande Senex, clare arte & Marte GEORGI
 Pæmer, Pæmeridum, Pieridûmq; decus,
 Vive valeq; TUIS, nunc salvus, Nestoris annos,
 Semper eras columen; dulce levamen eris.
 Nève recrudescat vulnus, Rex summe, doloris
 Sanati nondum, percipe Christe preces.
 Deniq; apud seros bene gratia magna Nepotes
 Stabit Pæmeridum, Pansa diserte, tibi.
 Voce parentasti querulâ quod in manibus huius,
 Quem Christus vetat & sancta Thaleia mori.

M. Johannes Chilianus Spremberger.
 Ecclesiæ Altorphinæ Pastor, F.

In luctuosissimum obitum,
NOBILISSIMI AMPLIS-
SIMIQUE VIRID. JACOBI POEMERI,
REIP. NORICÆ SENATORIS PRUDENTISSIMI,
& Academiae Noricæ Scholarchæ
dignissimi, ode

MICHAELIS PICCARTI FRANCHI, PRO-
FESSORIS NORICI.



Uid me querellis exanimem novis?
Quid ægra tundam pectora verberè?
Vellámq; crineis mentis exfors,
Lectibus omnia compleámq; ?
Quod si querellis, si lacrymis meis,
Quod si dolori numina tristia
Concederent nunc, inq; vitæ
Munia mî caput id referrent.
Desideratum pluribus optimis,
Desideratum Noricæ scholæ,
Desideratum PATRIBÚSQUE
(Norica Res quibus immoratur,
Et nixa celso se sociat polo,
Capútq; condit nubibus inclutum)
POEMERIDUM lumen JACOBUM,
Lumen item melioris ævi.
Nemo futurus me officiosior
Nemo alter : immo totus abivero
In planctuum lamenta pernix,
Diffluam & usq; calente fletu.
Vt adsiderem flumina patria,
Et triste mœstus succinerem melos,
Quod disceret Pegnessus à me,
Et fluvios alios doceret.

Post doctus: ut miscerem ego lacrymas
Fusas oclorum circulo ab uvido
Vndasq; Francarum rigantes
Delicium, decus urbiúmque;
Mistura quæ deín fluminaq; influens
Longinqua, in didita dissitas
Momenta luctus spargerétq;
Inq; rigaret ea arva fletu.
Hinc luctuosas collibus adsitis
Vocésq; sylvis ingeminarem ego
Moeroris immensi argumenta
Damna querens patriæ & Lyceii.
Donec doloris, flexilis & pia
Veniret ECHO, flebilibus modis,
In partem, & antro personaret
Credita verba profundiore.
Exin silens, aut murmure tertio,
Duras sororum exagitans vices
Netricum, & importuna iussa,
Vel Iovis imperium increparem.
Per foeta campi pascua pérque agros
Versos aratris sæpè micantibus
Donec propè aures accidiva,
Aura meæ bibat ægra mentis.
Sed quando surdis auribus hæc queror,
Et nemo leges inviolabiles
Fati resolvítq; arbitratum,
Quin lacrymis dolor usq; crescit.
Vox fracta Parcas nil quoniam adficit,
Nec plus malorum molibus adferunt,
Quam Præficæ fortè ejulatus,
Fusæ oculis lacrymæ suorum.
Contra dolenti fit geminum malum,
Et luctus extra qui positus modum est,
Effoeminatæ nec virilis
Indicium indolis esse fertur.

Desisto sanè questuum & uideos
Orbes oclorum pollice tergeo,
Et pectus hoc commasculare
Adgredior trepidante nixu.
Hoc addo luctuū: sub lapide hoc situm,
Et conditum secli, proh, decus unicum,
Iurísq; formam atq; æquitatis,
Et speculum pietatis ipsum.
Hoc aio: saxum contegere inclytæ
Virtutis omnem materiem & bonum,
Et quidquid umquam gens bonorum
Censuit aut pretio aut honore.

*Amplissimi desideratissimiq; Patroni ho-
nori F. Michael Piccartus Fr.,
Professor Noricus.*

IN OBITVM AMPLISSIMI NO-
BILISSIMIQUE VIRI, Dn. JACOBI
POEMERI, SENATORIS ET SCHOL-
archæ prudentissimi optiméque
meriti.

O' ΔΕΙΝΑ. ΑΚΑΔΕΜΙΑ ΑΛΤΟΡΦΙΝΑ.

Q Vanam, age, pallidula es? Acad: Musarum Norica nutrix.
Ergo quid humescunt perpeti ita umbre gena?
Acad: Perpetuo quod enim tabet mens icta dolore,
Post mortis jactum fulmen atroce manu.
Ergo tibi hoc tantum fixit Mors impia vulnus?
Acad: POEMERI figit dum mihi dulce caput.
Proinde tuus, POEMERUS, honos fuit? ô dolor! ô quæ
Te viduat tanto sors mala presidio!
Ille, tuus cæcis errat dum linter in undis,
Et Palinurus erat, & Cynosura simul:

Ille

Ille tua, ille idem traherent si structa ruinam,

Totum onus heroo vertice fulsit Atlas.

Quin duce nuper eo visa es super astra volare:

Nunc nitens per humum, vix trahis agra pedem.

Qua simul, ah, secuit P O E M E R I stamina vita,

Incidit pennas invida Parca meas.

Has ne tibi melior sirit Fortuna renasci?

Nasci iterum Phœnix si queat ille mihi.

Fide Deo: Restant Aquilæ, quarum ardua laudis

Remigio alarum, Gloria tendit iter.

Acad.

Δείνα.

Acad.

Δείνα.

Michaël Virdungus, Histor: ac orato-
riæ facultatis professor.

AD CONIVGEM ET LIBE-

ROS AMPLISSIMI SENATORIS AC

Scholarchæ, D. Jacobi Pæmeri,
piè defuncti.

SIt modus in lacrymis, charissima pectora, patrem
Queis tantum atq; virum nuper defletis ademtum.

Sunt equidem (fateor) mortalis stamina vitæ

P O E M E R O ante diem florente abscissa sub ævo :

Textore ut quondam properante absolvere pensum,

Licia rumpuntur subitò, ac præclara morantur

Exorsa artificis. Sed non obiisse putetis

Illum, cui melior vita est iam reddita coelo.

Non etenim hæc magni P O E M E R I vita vocanda est,

Corpore quæ vegeto, ac tenui comprehenditur aurâ:

Quæq; malis merfa est multis, & finibus arctis

Inclusa. Ast illa est vitæ nomine demum

Digna, polo atq; altâ Superûm quæ vivitur aulâ:

Quæq; malis curisq; vacat, nec tempora certa

Fixa habet aut metas, sed demto fine beata est.

Atq; hanc cœlesti Paradiso vivere vitam,

Jamq; à conspectu CHRISTI haud divellitur unquam,
POEMERUM, indubitata fides : quia munera CHRISTI,
Et nostra acceptas ob crimina corpore plagas,
Non dubitante fide amplexus fuit usq; IACOBUS
Poemerus : meritóq; sui confisus IESU,
Illibatam animam tandem exhalavit in auras.

*M. Georgius Mauricius
Witebergensis.*

AD ORNATISSIMUM ET
DOCTISSIMUM JUVENEM, CASPAR.
PANSA M, L. L. STUDIOSUM, DE MUSIS DOLENDO
obitu nobilissimi, amplissimi prudentissimiq;
viri, Dn. JAC. POEMERI, Senato-
ris & Scholarchæ &c.

*Q*uem, PANSA, tantis extulisti laudibus
Oratione luculenta, Vir fuit
Et his & illis laudibus lautissimis
Pietatis & virtutis & scientiæ
Iuris severi, dignus, & Collegii
Sacri Senatus testimonio gravi,
POEMERUS ille, cuius haud quidem fuit
Pars parva : quando Consulis prudentiam
Fránúmque quovis temperando tempore
Exeruit, atq; noxios ad carcerem
Prorussit, atq; simplicem innocentiam
Refecit albo calculo latissimè.
Et hoc ut ipsum posset expeditius,
Persapè noctis & quietis, optimum
Quod esse dicunt, rupit, & somnum velut
Sen. Epi. Brevissimum interjunxit, & dieculas

Labore

Labore totas publicè vel & domi
Consumpsit inter arduarum maximè
Rerum vices; & ad salutem publicam
Se impertiendo terminum vitæ suæ
Metâmq; rupit: Fata si possunt modò
Quid impediri, hic impedit hoc modo: Et
Sic ipse mortuum quidem se maluit
Quàm non ad usum Patriæ se impendere.
Lauda deinceps, PANSA, tales taliter,
Hac lege, ne quis ante canos, hic velut
POEMERUS, ex hac exeat vitâ, aut prius
Quàm sit Duumvir factus hac in Patria.
Sic, Pansa, quadam laude te vicaria
Multi beabunt. Sic habebimus Patres
Nostro in senatu: qui modò hoc agunt, Patres
Ut Patriæ sint nisibus præstantibus.
Deum quod oro! nempè nobis his opus,
Tam turbulento tamq; tristi tempore,
Casum minantur quando cuncta pessimum
Gravissimûmq;: quando censetur suo
Nunc ære virtus: quando nunc sententiæ
Adulterantur per nigras albæ, malè:
Fortuna quando contutit sævissima
Navem misellam Ecclesiæ sub pondere
Crucis subin gravissimèq; cernuat.

O IOVA, serva Patria tanta Patres
Tantos, & huic oppone vicino malo,
Bellona quod minaciter Germania
Intendit à truci quidem vicario
Turcæ! Quis iste? Præstat in silentio
Opem IEHOVÆ præstolari calicam,
Armisq; niti Spiritus stringentibus
Oculos protervos hostis istius; modò in
Cladem paratis ipsius certissimam.

Sed interim dum luctui suum damus,
Sacro Senatui virum quem suffice,

*JEHOVA, justum, æquum, salutis publica
Natum. Quod unum te rogamus unice.*

M. Christoph. Reich.

M Aturo qui consilio, Poemere, valebas,
Nunc præmaturâ morte peremte jaces.
Et poteras qui consilio immortalis haberi,
Mortalis proftas morte peremte ferâ.
Ludit in humanis sic Morta nefaria rebus!
Sic nîl est certum, quod vaga Luna videt!
Norica poscit opem Res-publica, Curia poscit,
Altorfina & opem poscit anhela tuam.
At, Poemere, taces; hinc te Res-publica luget
Norica, quin luget te sacer ordo Patrum.
Curia te luget, te Altorfinumq; Lycæum,
Te cives patriæ, te studiosa cohors.
At bene habet. Mortalis eras; nunc glorijs, atq;
Immortalis ades; gloria pandit iter.
Gloria pandit iter, tua gloria didita terris
Nunc incrementum, nec sine laude, capit.
Nunc immortalem dabitur tibi vivere vitam,
Cum Christóq; ævo prosperiore frui.
Ergo Altorfinæ tibi jam gratantur Athenæ,
Et cantat laudes gens studiosa tuas.
Norica gratatur Res-publica, Curia, cives,
Et conscriptorum sancta corona Patrum.
Grator & ipse tibi, & dico: Poemere beate,
Perpetuum salve, perpetuumq; vale.

Εὐσεβήματος ἑνεκα f.

*M. Georg. Klein, Diacon.
Norib. ad D. Virg.*

NOBI

NOBILISSIMO, AMPLISSI-
MO ET PRUDENTISSIMO VIRO, DOMI-
no Jacobo Pœmero, Scholarchæ & Senatori Rei-
publ. Noricæ dignissimo, patrono suo
summè observando, hanc nani-
am funebrem,

debitæ observantiæ & gratitudinis
ergò, humiliter dedicat

Daniel Wagnerus Winshemius Francus, Scholæ
Sebaldinæ collaborator.

EPICEDIUM.

PROSAPIÆ antiquæ, POEMERE, decórq; nitórq;
POEMERI fortis patris dignissima proles,
Æmule & insignis: quoties te volvo revolvóq;
Ægro animo (cunctas verò obversaris in horas,
Chare patrone, mihi) toties in millia membra
Viscera rumpuntur, fundunt suspiria & alta.
Nam quare renuam certissima signa doloris,
Dum vivus fueras studiorum fautor & auctor,
Virtutum columnen, Patriæ memorabile lumen,
Iustitiæ Mystes, sophiæ firma anchora: Portus.
Te vitâ functum luget Respublica, lugent
Templa, Scholæq; forúmque & mœnia Norica lugent.
Nam iudex æquus solummodò publica lucra
Spectabas, libris affixus nocte diéq;
Hærebas: vero zelo pietatis a vitæ
Ardebas: soboli exemplum laudabile vitæ
Præbebas. Fueras somni parcúsque cibique,
Principibus gratus, tecum traducere secla
Optabant, vivo tibi vota & fata ferebant.

Te vivo & salvo gaudebat patria chara,
Curia gaudebat, gaudebat docta corona,
Te tutore dato sibi mœnia salva vigeant.

Nobilitate, fide, virtutēq; clare patrone,
Fratribus & genitis tecum de sanguine claro
Pectoribus charus modò gaudia mille creabas

Nunc omnes juncti communis conscia luctus
Signa edunt certissima. Te vivum sibi reddi
Exoptant omnes. Verum quia fata peremptum
Morte semel, nunquam terrenis reddere rebus
Exoptant, mundi de mole in cœlica regna
Jovæ translatum pia degere secula sinamus.

Strenuus, afflictus variâ cruce, cuncta paratus,
Teste domo, è cœlo demissa pericla ferebas
Ostendens animi mœsti vestigia nulla.

Te licet ereptum Patriæ rebusq; paternis
Me lugere piè defunctum mœsta corona
Urgeat & stimulet: tamen, ô Patrone colende,
Te quoniam Jovæ, sapienter singula agenti,
Eripere huic terræ placuit, moderando dolorem,
Chare Patrone, tibi grator, placidâmq; quietem
Linquo: dum positâ terrenâ mole recondis
Corpus humo, mentem cœlesti at in arce reponis.

Vive, vale eternum veræ pietatis amator,
Vive quietus humi, donec te cœlica CHRISTI
Excîrit tuba, Tēq; eternâ sede beârit.

18. Junii anno 1608.

F I N I S.

H. Heinrich
BUCHBINDEREI - ERFABUNGEN
70566 Bottenburg

3/97



